

清史列傳

第一函
第八冊

清史列傳

卷三

宗室王公傳三

多羅克勤郡王岳託

岳託太祖高皇帝孫禮烈親王代善第一子初授台吉天命六年二月大兵略明奉集堡將旋有小卒指明兵所在岳託同台吉德格類等擊敗之三月上征拔濟陽大軍方追明總兵李秉誠於白塔鋪岳託後至逐北四十里途斬三千餘人初喀爾喀扎嚕特貝勒昂安執我使者送葉赫被殺八年四月同台吉阿巴泰等討之事詳饒餘敏郡王傳十一年十月復隨父大貝勒代善征扎嚕特部有功是年封貝勒天聰元年正月同二貝勒阿敏貝勒濟爾哈朗等征朝鮮攻義州定州漢山三城克之渡嘉山江克安州至平壤其守者棄城遁遂渡大同江次中和遣諭朝鮮王李倬降阿敏欲直趨至其都岳託知不可止密與濟爾哈朗議駐師平山城復遣副將劉興祚諭李倬倬報願歲貢方物岳託謀曰吾等事已成矣蒙古與明皆敵國或有邊事當思備禦宜盟而班師旣盟以告阿敏以己未與盟仍縱掠

岳託曰盟旣成縱掠非義也勸之不可復令李倬弟覺與盟乃班師五月從上征明同三貝勒莽古爾泰等率偏師衛塔山糧運又從圍寧遠並有功八月敗明兵於牛莊斬守備一千總二兵二百二年五月同貝勒阿巴泰碩託征明錦州有功事詳饒餘敏郡王傳三年八月略明錦州寧遠焚其積聚十月上征明岳託同濟爾哈朗由大安口入旦見明兵營山上岳託率兵半駐以待濟爾哈朗以其半擊之復見明兵自遵化來援者顧謂濟爾哈朗曰吾當擊此是日五戰皆捷十一月同阿巴泰敗大同總兵滿桂宣府總兵侯世祿於順義薄北京復從父代善擊敗明援兵十二月同貝勒薩哈璘等圍永平府克香河縣四年正月同貝勒豪格還守瀋陽五年三月命諸貝勒直言時政岳託奏曰刑罰舛謬實在臣等祈皇上擢用直諫士近忠良絕讒佞行黜陟之典明加甄別則諸臣咸知激勸矣七月初設六部命掌兵部事八月上征明大凌河城自白土場趨廣寧岳託同貝勒阿濟格等率兵二萬別由義州進會大軍都統葉臣率鑲紅旗兵圍城西南岳託軍爲策應十月明總兵祖大壽請降以子可法質可法見貝勒欲下拜岳託曰戰則爲仇敵和則爲弟兄何以拜爲命以國禮見因問爾等死守空城何意曰畏屠戮耳岳

託曰遼東以久抗不降故誅之殺永平人乃貝勒阿敏所爲已論繫之矣我皇上卽位以來敦行禮義治化一新養民愛士仁心仁政爾等豈不聞之可法曰上於貧者衣食之富者秋毫無擾寬仁愛民之德實皆聞之遂辭歸越三日大壽以城降夜襲敗錦州兵事具饒餘敏郡王傳六年正月奏言前克遼東廣寧漢人拒命者誅之後復屠永平灤州漢人縱極力撫諭人懷疑懼今天與我以大凌河漢人正使天下知我善養人也臣愚以爲善撫此衆歸順者必多當先予以室家出公帑給其需儻蒙天眷奄有其地仍給還家產彼必悅服衆官宜令諸貝勒給莊一區每牛畧取漢男婦二名牛一頭編爲屯人給二屯其出口耕牛之家牛畧以官值償至明兵棄鄉土窮年戍守一苦也畏我誅戮又一苦也今慕義歸降之漢兵令滿漢賢能官善爲撫恤毋令一人失所則人心歸附大業可成上嘉納之五月同濟爾哈朗等略察哈爾部於歸化城俘獲以千計九月同貝勒德格類拓疆自耀州至蓋州以南七年六月詔問證明及朝鮮察哈爾三者何先奏言時不可失山海關通州北京三路乘時圖其一則丕基定矣是月同德格類等率右翼楞額禮葉臣左翼伊爾登昂阿喇漢軍都統石廷柱元帥孔有德總兵耿仲明攻明

清史 列傳
旅順口俘獲無算八月奏言前蒙聖諭留一都統守旅順口今留葉臣伊爾登帥兩翼每旗留官三員兵二千五百名漢軍以遊擊佟圖賴主之統防禦二員兵百名駐守臣等自木場驛啟行俟抵我界貯礮車於蓋州留俘振旅是月師還上宴勞於郊以金卮酌酒賜之八年二月奏定馬匹倒斃擇牛衆殷實之家酌免丁徭責令償補又奏減牛衆下廝養卒得旨惟哨長許留餘悉罷三月上大閱岳託率滿洲蒙古等十一旗行營兵赴瀋陽城北郊列陣二十里許上駐蒲馬岡岳託指示紀律軍容嚴肅上嘉獎之五月上征察哈爾諭留守盛京諸貝勒及將領等畢岳託復曉於衆曰自隄岸以東巨流河以西原置十四哨爾等酌量布置晝則令軍士習射夜勿解衣張弓開甲囊以備不虞岳託隨行有疾六月上臨視命還盛京九年二月同貝勒多爾袞薩哈璘豪格收降察哈爾林丹汗子額哲六月師還諸貝勒略明山西岳託有疾以兵千留駐歸化城會土默特部人告博碩克圖汗子俄木布遣人偕阿魯喀爾喀及明使者至將謀我岳託伏兵邀之俄木布乳母之夫毛罕知之趣還伏猝起誅毛罕擒明使者隨命土默特捕斬阿魯喀爾喀之謀匿馬駝者部分土默特壯丁三千有奇爲十隊隊以官二員主之授條約並頒

於鄂爾多斯尋諸貝勒會師於歸化城岳託偕還崇德元年四月晉封和碩成親王八月以徇庇莽古爾泰碩託且有離閒鄭親王濟爾哈朗及肅親王豪格事論死特旨寬之降多羅貝勒罷兵部任十一月復命攝部事十二月從上征朝鮮國王李倬奔南漢山城同豫親王多鐸進圍之敗其援於城下二年八月命兩翼較射岳託奏不能執弓上曰爾徐引射之不射如他王貝勒等何諭再三始引弓弓墮地者五遂擲之諸王論岳託驕慢當死上復寬之降固山貝子罷部任罰鍰三年正月復封多羅貝勒管旗務二月從上征喀爾喀至博碩堆偵知扎薩克圖汗遁而還八月命爲揚威大將軍貝勒杜度副之統右翼兵與左翼奉命大將軍睿親王多爾袞分道伐明九月至牆子嶺明兵入堡外爲三寨我師攻克之獲敵卒知堡堅且有重兵不易拔嶺東西有閒道可趨於是分兵攻其前以牽敵師潛從閒道踰嶺入克臺十有一尋以疾薨於軍年四十有一四年三月睿親王奏捷上覽奏無岳託名驚問知病卒慟哭久之命勿使禮親王知四月喪還駕至沙嶺設幄遙奠還御崇政殿命王以下及諸大臣往奠覆命乃回宮轅朝三日詔封爲多羅克勤郡王賜駝二馬五銀萬兩葬盛京城南五里萬柳塘康熙二十七年十一

月命立碑以紀其功乾隆八年駕幸盛京親詣王園寢賜酹四十三年正月上追念王忠勳命配享太廟其見襲之平郡王復封號曰克勤八月入祀盛京賢王祠是年駕幸盛京復詣王園寢賜酹四十八年如之初賜襲羅洛渾克勤郡王岳託第二子崇德四年九月襲封多羅貝勒管旗務五年五月同鄭親王濟爾哈朗等迎蒙古多羅特部蘇班岱等降衆敗明兵事詳鄭獻親王傳九月同鄭親王圍錦州六年三月復圍之設伏敗明援兵於南山西岡六月睿郡王多爾袞肅郡王豪格來代合擊明山海關援兵追及松山城而還八月從上征明克松山擒明總督洪承疇巡撫邱民仰等七年七月敍功賜蟒緞七十八年正月以怨懟誹議又敏惠恭和元妃薨時絲竹不輟論罪削爵五月封多羅貝勒仍管旗事上命濟爾哈朗多爾袞召羅洛渾諭曰爾父屢獲罪愆因皇考太祖皇妣太后撫養爲子朕視之如弟歿後猶追封克勤郡王并加恩於爾命爲多羅貝勒管旗務爾不思率由善道以輔國政嗜酒作慝致干國法朕又追念爾父特行寬宥復爾多羅貝勒仍令管旗事爾當敬慎修身勤思善行若今仍嗜酒妄亂不第爾祿位難保卽置爾於法亦所不赦至本旗所屬諸臣俱宜戒酒仍勸勉貝勒效力贖罪羅洛渾率

諸臣叩首謝罪順治元年十月以從定京師破流賊功晉多羅衍禧郡王三年正月同肅親王豪格征四川八月薨於軍年二十有四五年正月喪還命貝子屯齊等迎之輟朝二日康熙十年六月追諡曰介 二次襲羅科鐸衍禧介郡王羅洛渾第一子順治五年閏四月襲封多羅衍禧郡王八年二月改封號曰平十五年正月隨信郡王多尼征明桂王朱由榔於雲南破其晉王李定國鞏昌王白文選等兵十六年六月賜蟒衣弓刀鞍馬旌其勞康熙二十一年七月薨年四十有三諡曰比 三次襲訥爾圖平比郡王羅科鐸第四子康熙十八年正月封貝子二十二年正月襲封多羅平郡王二十六年四月以毆斃無罪人羅米及折傷之桂菩薩保手足削爵 四次襲訥爾福平比郡王羅科鐸第六子康熙二十四年正月封固山貝子二十六年五月襲封多羅平郡王四十年七月薨年三十有一諡曰悼 五次襲訥爾蘇平悼郡王訥爾福第一子康熙四十年十二月襲封多羅平郡王五十七年十一月隨撫遠大將軍允禔收西藏尋駐博羅和碩五十九年正月移駐古木六十年十月攝大將軍事六十一年十一月復攝印如故雍正元年正月回京管上駟院事四年七月以前在西寧軍前貪婪受賄削爵乾隆五年

九月卒命仍以郡王禮葬 六次襲福彭原襲平郡王訥爾蘇第一子雍正四年七月襲封多羅平郡王十年正月任鑲藍旗滿洲都統四月奏凡外省來京襲職旗員到日隨奏不令久候多費以仰副體恤至意從之閏五月授宗人府右宗正十一年二月充玉牒館總裁四月命軍機處行走七月命爲定邊大將軍討逆賊噶爾丹策凌十一月師駐烏里雅蘇臺十二月奏言軍中駝馬最要今喀爾喀扎薩克貝勒班第等感恩獻駝馬力請停償價值伏念遠臣當軍興際不肯私所有況宗室王貝勒貝子公等皆有馬場滋生馬匹豈不內愧於心臣家有馬五百匹願送軍前備用並將臣奏宣示諸王貝勒貝子等臣料諸宗臣等必以臣言爲當彌切踊躍急公之義得旨允行十二年六月奏言烏里雅蘇臺扎克拜達里克推河並應撤京城滿洲漢軍右衛寧夏察哈爾土默特兵三千六百所有內扎薩克及烏蘭察布兵三百七十調赴推河駐防見在烏里雅蘇臺餘兵九千不敷調遣請以洪鄂爾鄂隆所調滿洲兵六百再增撥四百速赴軍營從之是月王率將軍傅爾丹赴科布多總統北路軍營令內大臣薩木哈掌威遠將軍印辦理烏里雅蘇臺軍務八月詔量撤北路兵王率副都統王常等領兵還十三年閏四月命總統

大兵駐鄂爾坤七月於額爾德尼昭迤北築城尋以公慶復代還京乾隆元年二月上以北路所存糧米如何令蒙古兵支領並屯穫糜米出陳易新之處詔令查議奏言蒙古兵向不給糧臣前以坐卡兵遠臨賊境取羊未便曾折給一月米糧茲蒙皇上軫念蒙古一視同仁加恩賞米臣議將存留之喀爾喀兵及坐卡臺站蒙古兵攬米支給今王大臣等又議將派駐鄂爾坤之蒙古兵給糧在此時存米充裕不難槩給儻日久米少議停轉生怨望且準噶爾鬼蜮多端將來或仍須蒙古兵移駐又豈能一例支給北地寒涼蓋藏得宜米可經三四年不壞臣愚於駐防蒙古兵酌量賞給餘請仍給羊價爲便再鄂爾坤種地兵已撤糜麥無從易新青稞大小麥較米尤不耐蒸遏應請恩賞蒙古米糧先給此項麥石又奏言喀爾喀所牧馬除留軍營備用外各游牧處見有馬二萬九千餘內扎薩克各游牧處馬四萬餘伏思鄂爾坤駐兵以歸化城爲聲援其閒距三千餘里鞭長莫及中途須接換有馬往來緩急始足恃請度適中地近臺站水草佳處設馬廠於土默特察哈爾兵內擇有眷屬者移駐牧放令歸化城都統協理再請撥騾馬萬兒馬二千令臺站總管撥入官馬廠牧放備用有事無難輕騎疾馳馬力足而人心可恃

雖道遠無慮矣詔並下王大臣議行三月任正白旗滿洲都統十月調正黃旗滿洲都統三年七月預議政十三年十一月薨年四十有一諡曰敏 七次襲慶寧敏郡王福彭第一子乾隆十四年三月襲封多羅平郡王十五年九月薨年十九諡曰禧無嗣 八次襲慶恆原襲平郡王訥爾蘇孫貝子品級福秀第一子出爲福彭後乾隆十五年十二月襲封多羅平郡王十九年八月任鑲紅旗漢軍都統二十六年十二月授宗人府右宗正尋管理鑲紅旗覺羅學二十七年閏五月坐旗屬冒借官銀降固山貝子餘任悉罷四十年閏十月復封多羅平郡王四十三年正月命復克勤郡王始封之號仍爲克勤郡王四十四年二月薨年四十有七諡曰良 九次襲雅朗阿原襲平郡王訥爾圖孫閒散宗室訥清額第十子乾隆十六年十月授三等侍衛二十六年七月任鑲紅旗蒙古副都統九月授烏里雅蘇臺參贊大臣二十七年八月調正紅旗滿洲副都統尋授科布多參贊大臣三十一年十二月任成都副都統三十四年三月授荊州將軍三十五年十月以袒護所屬驍騎校楚德降三級調用十一月以副都統品級往庫爾喀喇烏蘇辦事三十七年五月復以徇隱臺站屬員不法削副都統品級在伊犁印務筆帖式行

走八月奉旨著在庫爾喀喇烏蘇章京處辦事十月以副都統品級赴塔爾巴哈臺十一月奉旨雅朗阿辦事得宜仍留庫爾喀喇烏蘇辦事三十八年十二月任三姓副都統三十九年十二月調盛京副都統四十年十月調黑龍江副都統四十一年十二月遷綏遠城將軍四十四年四月襲封多羅克勤郡王四十五年九月管理鑲藍旗覺羅學尋授宗人府右宗正四十七年二月任正白旗漢軍都統四十八年四月調鑲紅旗滿洲都統七月調正黃旗滿洲都統五十一年十一月充玉牒館總裁五十九年二月以病解都統任五月罷右宗正任並覺羅學十二月薨年六十二諡曰莊 十次襲恆謹克勤莊郡王雅朗阿第三子乾隆四十九年十二月歲滿封三等鎮國將軍六十年三月襲封多羅克勤郡王嘉慶四年五月皇后出神武門恆謹失避道削爵賞四品頂帶往守西陵十二月授散秩大臣七年十月封不入八分輔國公八年二月故 十一次襲尙格克勤莊郡王雅朗阿孫原任三等侍衛佐領晉封多羅克勤郡王恆元第一子嘉慶四年六月襲封多羅克勤郡王

多羅謙郡王瓦克達

瓦克達太祖高皇帝孫禮烈親王代善第四子天聰元年五月上親征明寧遠明總兵滿桂拒戰大敗之追至寧遠城下瓦克達以力戰被創崇德五年七月隨睿親王多爾袞圍明錦州見敵兵出樵者以十餘人越前鋒統領布顏軍擊斬之六年八月明總督洪承疇集兵十三萬援錦州次松山大軍進擊之敵騎來奪我紅衣礮瓦克達同輔國公滿達海力戰卻之會天雨敵復來戰又敗之復進擊承疇三營步兵前鋒什長費雅思哈失馬瓦克達與之累騎出參領哈寧阿墜馬創甚敵圍之數重瓦克達直入其陣挈以歸順治元年四月隨睿親王入山海關敗流賊李自成追剿至望都十月隨英親王阿濟格由邊外趨綏德二年五月自成遁湖廣躡追至安陸府賊衆千餘方乘船遁瓦克達同護軍統領鼇拜率師涉水登岸射殪賊衆無算獲其船以濟大軍三年正月敍功封三等鎮國將軍先是崇德八年八月因兄碩託兄薩哈璘之子阿達禮謀立睿親王伏誅瓦克達坐黜宗室至是復入宗室五月隨豫親王多鐸剿蘇尼特部騰機思騰機特等大敗之圖拉河進至布爾哈圖山瓦克達與貝子博和託合軍斬千餘級擒八百餘人獲駝馬牛羊無算又擊敗喀爾喀土謝圖汗等兵十月師旋四年三月封鎮國公五年十

一月晉封多羅郡王十二月以喀爾喀部擾我邊界命隨英親王阿濟格駐防大同姜瓖叛據大同附近郡邑應之王隨英親王圍渾源州六年三月睿親王統師拔渾源州令還京七月命同親王滿達海剿賊朔寧武八月以巨礮攻克朔州城僞總兵姜之芬僞兵道孫乾高奎遁王與輔國公薩弼擊敗其還戰兵移師攻寧武關僞總兵劉偉僞兵道趙夢龍焚城西遁王追之時大同僞總兵楊振威通款英親王軍斬瓖首以降偉夢龍等亦率僞將五十餘人兵五千四百餘降於軍平靜樂縣及寧化所八角堡諸寨十月詔滿達海還京以王代爲征西大將軍剿撫山西餘賊七年二月疏報大兵分剿潞安平陽澤州叛黨僞總兵申亥郭中傑魏閔各率餘黨歸順廢官李建泰叛據太平縣圍之二十餘日窮蹙遂出降詔誅建泰及其兄弟子姪籍家產入官三月奏復平陽府屬三十六州縣四月班師八年二月加封號曰謙三月命諸王分管部務王掌工部十月預議政九年正月以醫人何大福出入部署辱罵職官招搖嚇詐伏誅王坐徇縱罰緩解部任四月罷議政八月薨年四十有七康熙十年六月追諡曰襄初王剿山西賊時嘗駐平陽後平陽民追思其戢軍安民建祠以祀榜曰多羅謙郡王廟

初次襲哈爾薩謙襄

郡王瓦克達第三子順治十年閏六月議政王等以瓦克達曾獲罪郡王爵不應承襲上憐其子留雍哈爾薩命食奉國將軍品級俸康熙六年四月哈爾薩等訴其父軍功輔政大臣鼐拜尙書馬爾賽爲哈爾薩姻戚議封哈爾薩鎮國公留雍鎮國將軍八年七月留雍以已不得與弟一例晉爵訴不平議政王奏留雍等俱賁緣得封應革哈爾薩鎮國公并原有之奉國將軍品級留雍應革鎮國將軍仍食奉國將軍品級俸旨哈爾薩奉國將軍品級俸乃世祖章皇帝恩給仍如舊二十一年五月哈爾薩復訴父爵係軍功所得例得襲宗人府以奏命襲封鎮國公并封其子海青爲輔國公二十二年八月授宗人府左宗人二十四年九月遷右宗正二十五年十月諭責哈爾薩鑽營不安分罷右宗正任削鎮國公及海青輔國公爵二次襲留雍謙襄郡王瓦克達第二子康熙二十五年十月襲封鎮國公三十七年四月詔宗人府會同領侍衛內大臣察劾行走懶惰者削留雍爵停襲乾隆四十三年三月上追念謙襄郡王瓦克達勞績賜一等鎮國將軍爵世襲罔替三次襲洞福原襲鎮國公留雍曾孫初留雍第三子原封三等輔國將軍台渾生忠端爲閒散宗室洞福忠端第二子也乾隆四十三年三月襲封一等鎮

國將軍四十九年十月授護軍參領五十七年五月卒年五十有二 四次襲德文泰一等鎮國將軍洞福第二子乾隆五十五年十二月歲滿封二等奉國將軍五十七年十一月襲封一等鎮國將軍嘉慶三年二月授佐領

多羅順承郡王勒克德渾

勒克德渾太祖高皇帝曾孫追封穎毅親王薩哈璘第二子兄阿達禮以謀立睿親王多爾袞伏誅勒克德渾亦坐黜宗室順治元年十一月上念勒克德渾年幼未與謀命復入宗室封多羅貝勒二年七月命爲平南大將軍代豫親王多鐸駐江寧分兵剿撫兩浙時明魯王朱以海據浙東稱監國其大學士馬士英等率兵渡錢塘江立營擊卻之九月遣左翼副都統珠瑪喇敗士英於餘杭右翼副都統和託敗其總兵方國安於富陽兩翼合營杭州城三十里外敵來突復大敗之士英國安復渡江來窺爲副都統濟席哈等所敗溺死無算時明唐王之總督何騰蛟合流賊一隻虎竊據湖廣州郡十一月命同鎮國將軍鞏阿岱都統葉臣征之三年正月大兵自江寧抵武昌偵知叛賊總兵馬進忠王進才應騰蛟於長沙遣護軍統領博爾輝等進擊賊千餘掠臨湘殲之抵岳州叛將遁降其副將黑運昌

至石首聞賊渡江犯荊州遣尙書覺羅耶球等以偏師赴南岸伺賊渡擊之大兵乘夜疾馳詰旦抵城下分兩翼躡賊營大破之斬獲甚衆薄暮耶球等亦尋奪賊船歸翌日遣奉國將軍巴布泰等分追賊於安遠南漳喜峰山關王嶺襄陽府擊斬殆盡次彝陵流賊李自成弟孜僞磁侯田見秀僞義侯張耐僞武陽伯李佑僞太平伯吳汝義及僞將三十九人馬步賊五千有奇詣軍前降獲馬贏牛萬二千餘捷聞得旨優獎七月班師十月賜金百兩銀二千兩五年九月晉封多羅順承郡王尋同鄭親王濟爾哈朗拔湘潭擒騰蛟事詳鄭獻親王傳移師征廣西賊渠趙廉犯全州率前鋒統領席特庫等敗之獲馬四十餘曹楨子據永安關破其營斬關入九月曹楨子復率黨萬餘寇道州又擊敗之七年正月師還賜金五十兩銀五千兩五月預議政八年三月掌刑部事九年三月薨年三十有四康熙十年六月追諡曰恭惠 初次襲勒爾錦順承恭惠郡王勒克德渾第四子順治九年八月襲封多羅順承郡王康熙十一年八月掌宗人府事十二年十二月逆藩吳三桂反命爲寧南靖寇大將軍由湖南進征十三年三月駐荊州時沅州常德相繼失陷賊兵自蜀道直抵巴東襄陽勢甚急遣都統鄂訥馳防是月僞將劉之復